

《泰特斯 2.0》  
著作權人 | 莊梅岩

第一幕

谷: 呢個係一個復仇嘅故事。主角係古羅馬驍勇善戰嘅將軍泰特斯，佢本來有二十五個仔，但係喺一場歷時十年嘅戰爭裡面，佢失去咗二十一個仔。最終泰特斯都擊敗外敵哥特人，今日佢帶住剩返嗰四個仔路歇斯，繆歇斯，昆塔斯同馬歇斯，平安返抵羅馬。佢做嘅第一件事，就係安葬所有陣亡嘅兒子。

泰特斯帶住哥特人嘅戰俘嚟到自己家族嘅墓地，當中有哥特皇后塔摩拉同佢三個仔：阿拉斯，狄米斯同祈倫。大家都沈默咁等待羅馬人發落，除咗塔摩拉，佢知道自己嘅長子阿拉斯會成為敵國祭品，於是拋開皇后嘅尊嚴，呼天搶地咁跪喺泰特斯面前：「將軍！求你可憐吓我！我個仔同你嘅仔一樣，都係為國家而戰，你愛你嘅仔，我何嘗唔愛自己嘅骨肉？我會做你嘅俘虜、臣服羅馬！求你放過我個仔！你要效法天神，學吓佢點樣慈悲為懷！」呢個母親嘅眼淚不特止得唔到羅馬人嘅同情，反而激起更大嘅怨恨，佢哋諗起十年嚟幾多親友同胞命喪哥特人兇殘嘅刀下，復仇嘅情緒一發不可收拾。

Andy: 「哥特人嘅長子一定要死！」「我哋要用劍支解佢嘅身體！」「將佢燒成一堆炭焦！」……塔摩拉眼白白睇住阿拉斯被拖走，喺一片歡呼聲同喝采聲之中睇住自己個仔被支解，連內臟都被挖出嚟燃燒。當士兵宣告祭禮結束嘅時候，佢嘅眼淚已經流乾。

泰特斯向羅馬嘅新舊墳墓作最後禱告：「我泰特斯，用眼淚向呢班英勇嘅靈魂作最後告別。我嘅孩兒、羅馬嘅勇士，安息啦。喺呢度可以避過人世間嘅禍害。既無陰謀，又無妒忌，毒草不生，風波不起，只有沉默同永久嘅長眠。從此你哋喺和平同光榮之中，好好安息。」呢個時候一個少女行到泰特斯身邊，佢恬靜平和，用眼神就可以安慰呢個老人家蒼桑嘅心靈，佢就係泰特斯唯一嘅女兒拉維妮婭：「父親，我向兄弟追思致敬，再跪喺你膝下，慶祝你平安歸來，願您從此安享晚年。」

清: 本來羅馬嘅紛爭應該喺呢片和平溫馨嘅情況下結束，但係自從先帝駕崩，大皇子薩特尼同二皇子巴西安為爭帝位各擁黨羽，今日佢哋都嚟迎接泰特斯，要呢位得高望重嘅將軍表態支持。

可惜兩位皇子唔知道呢十年嚟泰特斯為羅馬出生入死，早已成為人民心目中繼承皇位嘅最佳人選，泰特斯嘅細佬瑪格斯以護民官嘅身份，匆匆趕到墓前，向自己嘅哥哥話：「泰特斯，你絕對有資格做皇帝！」兩位皇子大為震驚，薩特尼仲因此而喊打喊殺，差啲同泰特斯嘅長子路歇斯劍拔弩張。當大家以為內戰勢難避免，泰特斯竟然安詳咁講：「羅馬光榮嘅身體係唔應該放上一個老邁衰弱嘅頭顱。假若我今日即位，聽日就撒手塵寰，咪又累大家忙碌一番？羅馬，四十年嚟我為你南征北討，依家我別無所求，只要一枝助我安享晚年嘅拐杖。」佢重申只要可以經常見到佢心愛嘅女兒拉維妮婭，佢人生就已經滿足。

**Masu:** 「我要求羅馬人民擁戴先皇嘅長子，薩特尼殿下，但願您用美德眷顧羅馬，如同陽光普照大地，令國土之上結滿公義嘅果實。」泰特斯帶頭大叫：「薩特尼我皇萬歲！」群眾喺佢嘅鼓舞之下都齊心向薩特尼歡呼：「薩特尼我皇萬歲！薩特尼我皇萬歲！」

薩特尼好興奮咁話：「泰特斯，羅馬嘅歷史將會記低呢一刻，假使有日我忘記泰特斯您嘅功績，我就唔再值得羅馬人效忠！」佢一登上皇位，就話要納拉維妮婭為皇后，以光大泰特斯家族嘅門楣；而泰特斯亦欣然接受，為佢表示自己嘅忠心，佢仲將寶劍、戰車、俘虜以及一切呈獻俾皇上，作為羅馬新皇座嘅禮物。但係新娘子對呢樁婚事就一啲都唔雀躍，因為佢同二皇子巴西安原來早有婚約，只要等泰特斯答應，兩個人就可以同偕白首。巴西安向泰特斯據理力爭，就連拉維妮婭嘅兄長路歇斯都睇唔過眼。

**Kin:** 「父親，拉維妮婭同殿下有婚約在先，你可以要佢死，但係唔可以迫佢另嫁他人。」其他人都異口同聲咁話二皇子只係想擺返屬於佢嘅嘢，泰特斯面色一沉，佢家族嘅成員竟然反抗佢。

巴西安見有人支持自己，於是即刻趁機同拉維妮婭逃走，一時之間雙方嘅人馬大打出手，泰特斯氣上心頭，慌忙為皇上追截出走嘅新娘，但係就受到自己其中一個仔繆歇斯嘅阻攔，泰特斯諗起家族嘅聲譽將要斷送喺呢班魯莽嘅年輕人手上，情急之下手起刀落，竟然親手殺死繆歇斯。大家睇到泰特斯嘅怒氣同狠心，一時無言以對，痛失哥哥嘅拉維妮婭更係傷心得寸步難行。

當時只有一個人比泰特斯更憤怒，佢就係高高在上嘅薩特尼。佢認定泰特斯一家連同巴西安當眾羞辱佢，於是把心一橫，轉向美麗嘅塔摩拉求婚：「我寧可信任一個曾經與我為敵嘅人，都唔再願意相信佢哋呢班偽

君子。」

Ivy: 塔摩拉欣然答應：「我願意為奴為婢，做個溫馨保母，你嘅再生之母。」薩特尼好蔑視咁將拉維妮姬送返俾巴西安，仲話：「終有一日我會以牙還牙！」但係巴西安唔肯認錯，仲要求薩特尼唔好怪責泰特斯。

可憐無辜嘅泰特斯，半句鐘之前仲係再生之父，依家已經變成皇上嘅眼中釘。薩特尼決定要向泰特斯報復，呢個時候新皇后塔摩拉竟然幫泰特斯講好說話：「我以人格擔保，泰特斯將軍係清白嘅，希望你從我所求，以仁善看待佢嘅行為；唔好為咗無謂嘅猜測失去一個高尚朋友，唔好用怒目括傷佢善良嘅心地。」薩特尼見塔摩拉求情，於是就放過泰特斯，塔摩拉仲告誡巴西安今後要循規蹈矩，又叫泰特斯嗰三個仔同拉維妮姬跪低向皇上求情，保證今後唔再生事。路歇斯雖然心有不甘，但係都硬住頭皮咁跪地求饒。

康: 泰特斯非常感激塔摩拉，但其實塔摩拉另外有一個如意算盤，佢細細聲同薩特尼講：「唔好固執喇皇上，你即位冇耐，唔好將人民趕到泰特斯嗰邊，一陣背上忘恩負義嘅罪名就唔抵喇。一切包喺我身上，終有一日我會將佢哋殺個片甲不留，等佢哋知道要一個皇后當街長跪會得到乜嘢報應。」薩特尼明白箇中道理，於是假意寬容，批准拉維妮姬同巴西安嘅婚事。泰特斯未知自己種下殺機，仲為咗緩和氣氛，就邀請皇上皇后眾人第二日去森林打獵。直到各人離去，泰特斯家族所有成員先敢跪地求情，哀求泰特斯俾剛才死喺父親劍下嘅繆歇斯葬入祖墳。泰特斯一開始堅決不從，因為佢認為呢個仔嘅所作所為令家族蒙羞，不過經唔起眾人嘅懇求，最後都俾繆歇斯安葬喺泰特斯家族嘅墓地。

當所有人喺度奇怪點解塔摩拉會突然得寵，婚禮嘅奏樂就已經響起，泰特斯第二十二個仔嘅犧牲換嚟一陣和平，但係亦埋藏咗摧毀力更大嘅動盪。

(音樂 20")

第三幕  
第一場

(全體椅上屏息 15'，散開椅，到位置靜止)

Kin: 羅馬街道上人聲鼎沸，泰特斯深信兩個仔係清白嘅，沿途跟住昆塔斯同馬歇斯上刑場，連爬帶跪，哀求街道兩旁嘅長老同護民官幫手求情：「求你哋開恩，對呢兩個定咗罪嘅小兒、天良未泯嘅小兒，大發慈悲。我有為過廿一個仔流過眼淚，因為佢哋死得光榮而家喺高處安息。但係為咗呢兩個，我喺塵土之中寫低我內心嘅痛苦——以老淚為泥土止渴，以免小兒嘅血令大地羞愧面紅。」一眾長老個個都鐵石心腸，望都有望泰特斯一眼就悄然離開，泰特斯只好哀求大地，叫佢唔好飲佢兩個仔嘅血。路歇斯嚟到父親面前，見父親一個人向住地上嘅石頭講嘢，於是勸佢無謂浪費自己眼淚。但既然人間無情，泰特斯就繼續向石頭訴苦：「石頭永遠都會聽我講嘢，佢哋好似蠟燭一樣柔軟，相反長老嘅心腸就比石頭更堅硬；石頭係沈默而不傷害他人嘅，相反長老就會搬弄口舌，將無辜嘅人宣判死刑。」佢淚眼昏花見兒子手持寶劍，先知原來路歇斯想劫獄救返兩個細佬，結果俾皇上放逐，一怒之下準備攔劫囚車，泰特斯明白兒子心情，但係事到如今佢睇清羅馬嘅真面目，就苦勸路歇斯：「餓虎需要獵食，而羅馬畀佢嘅獵物，就係我同我嘅家人。」泰特斯唔想冇埋唯一嘅仔，所以要佢盡快離開羅馬。

康: (行到各人前說書，各人用兩款單一元素) 其時瑪格斯突然抱住一個女子出現，呢個細佬睇起上嚟比泰特斯仲要絕望：「泰特斯，你預備喊啦，我怕你個心會粉碎……」眼前係一具失去靈魂嘅身體，污糟、扭曲，雙手俾人斬咗，鮮血淋漓！泰特斯唔願意相信呢個就係自己嘅乖女，仰天長號：「妳未嚟之前我嘅悲傷已經到達頂點，依家就好似河水氾濫。畀把劍我，我要斬埋我對手！」路歇斯幾乎瘋狂：「妹妹！係邊個害成你咁樣？」呢個時候瑪格斯帶出另一個惡耗：「我正話喺森林見到佢，佢好似一隻受咗重傷嘅野鹿喺度四圍搵地方嘍。佢嘅脷亦都俾人割咗！」拉維妮婭不但有能力回答路歇斯嘅質問，從此以後開朗嘅笑聲同歌聲都唔會再出自呢把口。泰特斯心如刀割：「如果傷害佢嘅人，一刀殺死我，我個心都有依家咁痛。我好似孤身企喺礁石上，周圍係茫茫大海，睇住海潮逐步高漲，等住有個無情巨浪將佢吞嚥入去滔滔海心。」

(全體椅上靜止 20")

Masu: 泰特斯見到女兒遭逢劫難，女婿又死於非命，突然抽住拉維妮婭問：「妳講！係唔係妳兩個哥哥殺死巴西安？究竟發生咩事？」(全體跳地，Masu

到各人前說書，各人靜止)

當佢話俾拉維妮婭知兩位兄長已經被判死刑，拉維妮婭顯得痛心疾首、淚流滿面，佢舉起殘肢向天空亂舞，但係就冇人明白佢想表達嘅乜嘢。泰特斯毫無辦法，叫拉維妮婭做手勢教人點安慰佢，又要一家人陪拉維妮婭坐喺水池邊：「我哋一齊低頭望吓塊面嘅倒影 (低頭)，睇吓眼淚嘅疤痕好似新退嘅洪水，留低泥污喺未乾嘅草坪之上？我哋好唔好將眼淚流落池水，直至佢失去清鮮味道、化成一潭鹽水？抑或我哋學你咁斬咗隻手？或者咬斷條脷，喺無言嘅沉默之中，渡過可恨嘅餘生？」眾人呆望天空 (望上)，好似罪人上唔倒天堂一樣。

一片愁雲慘霧之下艾倫帶嚟皇上面諭 (全望 Masu, 谷→Masu):「泰特斯，你係愛子情深嘅話，就叫瑪格斯、路歇斯、或者泰特斯你自己斬一隻手、送到皇上面前，就可以換取皇恩大赦將你兩個仔交返俾你——你哋要快啲決定，如果唔係就嚟唔切架啦！」雖然開出嘅條件異常殘酷，但係只要一線生機，賠上自己嘅性命泰特斯都在所不惜。只係瑪格斯同路歇斯都爭住奉獻出呢隻手，佢唯有假意使開佢哋去搵斧頭，等佢哋一另轉背就叫艾倫揮劍斬自己隻右手落嚟、送去俾皇上。(6人→US 望 US)

Ivy: 艾倫走咗之後剩返泰特斯同拉維妮婭 (6人轉望 DS), 泰特斯向天禱告：「有邊位天神可憐我嘅眼淚嘅，我就向邊個祈求。」拉維妮婭亦都好痛心咁跪喺父親旁邊，舉起雙臂。呢個時候瑪格斯衝返入嚟，佢估得冇錯，佢哥哥呢咗佢！佢見到泰特斯冇隻手，想埋去安慰佢，咁反而增加泰特斯嘅悲傷：「上天哭泣，大地唔係喺度氾濫咩？狂風怒號，大海唔係喺度洶湧恐嚇上天咩？我就係大海。我個女係哭泣嘅天空，聽吓佢嘅嘆息怒號。我嘅海水必然畀佢嘅嘆息吹動，我又係大地，我嘅土地必然畀我個女嘅眼淚，浸到洪水氾濫而陸沉。」瑪格斯知道，依家唯獨係兩個姪仔平安返嚟先可以安撫到兄長嗰顆傷痕累累嘅心。

清: 時間一分一秒咁過去，等到傷口凝結傷痛麻木，都仲係未見兩個仔返嚟一家團圓 (5男→DS)。落日嘅餘光將廣場照耀到一片璀璨，泰特斯終於見到路歇斯熟悉嘅剪影抽住一個包袱返嚟，裡面原來裝住昆塔斯同馬歇斯嘅頭顱，仲有泰特斯白白犧牲嘅右手！呀~~~「父親，我哋俾人呢咗！……你嘅哀傷係人哋嘅娛樂，你嘅決心係大家嘅笑柄。」瑪格斯為兄長義憤填膺：「我要將我個心變成永遠焚燒嘅地獄！呢種慘事唔係我哋人類可以忍受嘅。陪住流淚嘅人一齊喊總可以覺得安慰，但係哀傷加上畀人譏笑就係雙重死亡。」佢叫泰特斯唔好再等，因為暴風雨已經嚟咗，係時候採取報復行動。(全體笑追逐 30")

Andy: 泰特斯靜靜地望實地下嗰兩個頭，突然大笑。(A 倒地)

清: 喪子之痛令泰特斯本來凝固嘅傷口再度崩裂，對住一地殘骸同佢所餘無幾嘅親人 (清倒地)

谷: 佢知道安享晚年嘅卑微願望唔會實現，因為唔使瑪格斯講佢都決意踏上復仇嘅路 (谷倒地)

康: 「呢兩個頭顱好似喺度恐嚇我——如果未能以其人之道還治其人之身，就永不超生！」(Masu Ivy 倒地)

Kin: 佢同瑪格斯分別攞起昆塔斯同馬歇斯嘅頭顱，叫拉維妮婭用口耽住自己隻斷手 (康倒地, Masu 起)

Masu: 要路歇斯投奔哥特人，徵集一支軍隊。(Kin 倒地, Ivy 起)

Ivy: 路歇斯望住爸爸、妹妹、叔叔慢慢喺廣場消失，佢只能夠獨自上路。(全體衝至 DS)

全體(路歇斯): 「再見喇父親！再見，高傲嘅羅馬！路歇斯會再返嚟；佢愛佢嘅家人多過自己嘅性命。再見，拉維妮婭，但願你仍然係從前嘅你！但係事到如今，我哋兩個都要生活喺隱蔽同悲哀之中。路歇斯有生一日，都會為你報仇雪恨，我即刻去哥特人嗰度召集兵馬，要高傲嘅薩特尼同佢個皇后，好似古代嘅昏君妖后咁喺城門乞求開恩。」

(全體靜止 15'， 全體搬椅 2-3-2, musician exit)

## 第四幕

### 第二及第三場

(Sequence: Ivy→康→Kin→谷+清,+Andy)

全體輪讀: 月明星稀，皇宮門口嘅廣場聚集咗泰特斯家族嘅人，當中有泰特斯、瑪格斯同泰特斯幾個姪仔坡力斯、辛普斯、卡厄斯。佢哋漏夜嚟到呢度，由泰特斯向上蒼申訴：「(谷)正義女神已經離開咗人間，佢走咗佬。大家帶齊武器去海洋度撒網啦，好彩嘅就喺海上撈到佢；不過海洋同陸地一樣都係冇天理。」

(Ivy)泰特斯要幾個姪兒用鋤頭鐵鏟一路掘到入地獄，目的就係遞呢封請願信俾正義女神，求佢幫手主持公道。佢哋一路掘地，(康)泰特斯就一路大聲宣揚薩特尼點欺壓人民，(谷)瑪格斯明知哥哥係傷心到喪失理智，但係唔忍心令佢失望，就叫一干人等順住佢意做，佢仲鼓勵大家，話路歇斯好快返嚟報仇雪恨。

當泰特斯問大家有冇喺地獄發現正義女神嘅影蹤，其中一個姪兒坡力斯就答話：「冇呀伯父，(Kin)不過地獄有回音畀你。你用得着地獄嘅復仇女神嘅話，佢會隨傳隨到。但係正義女神呢，佢就太忙嘞。要等多一陣至得。」泰特斯越等越嬲，激動到大叫。

「我要跳入地獄火海，捉住正義女神雙腳拉佢上嚟。瑪格斯，我哋唔係骨架高大大嘅巨人，而即使我哋係銅皮鐵骨，所背負嘅冤屈實在太大，就嚟承受唔起。既然人間同地獄都有正義，我哋求天上嘅神明主持公道啦！」(Ivy)佢將弓箭分俾眾人，要佢哋將戰書射入皇宮，(康)於是大家放低鋤頭，舉起弓箭照辦。

泰特斯嘅戰書好似雪花咁飄入皇宮，呢啲戰書雖然唔係寫俾皇上，而係寫俾天上嘅正義之神同地獄嘅復仇女神，但係上面一字一句都記載住泰特斯家族嘅冤情，矛頭直指羅馬帝國嘅忘恩負義。

泰特斯大叫大跳咁話金牛座俾佢哋射用咗一隻角，而瑪格斯就接住話金牛座發牛脾氣撞到山羊座，(Ivy)跌咗兩隻羊角俾皇后個黑奴才執倒，由皇后送俾皇上做禮物，(Ivy)暗示皇后送咗頂綠帽俾皇上戴。

(當 Ivy 讀到此，全體停，清快重讀此段)

Masu: 喺另一邊廂，皇上同皇后手上擺住好多戰書。薩特尼好嬲，佢一直認為處決昆塔斯同馬歇斯係秉公辦理，係泰特斯接受唔到現實至喺度造謠生事，雖然佢都聽聞泰特斯最近變得瘋瘋癲癲，但係依然好介意佢損害皇

室尤其係自己嘅聲譽。塔摩拉要佢保持冷靜：「念在泰特斯年紀老邁，喪子之痛傷透佢嘅心，你應該安慰而唔係計較佢藐視你嘅行為。」但係薩特尼完全聽唔入耳，佢好想殺死泰特斯 (*pause*)，仲認定泰特斯當日擁立佢其實只係為咗控制佢。當薩特尼坐立不安嘅時候，狄米斯同祈倫帶嚟惡耗，狄米斯緊張咁報告：「羅馬告急！哥特人集合大軍，下定決心要攻打我地。」祈倫就補充話：「領軍嗰個係泰特斯個仔路歇斯，佢立誓報仇，要鏟平羅馬。」(*pause*) 薩特尼心諗，平日微服出巡嘅時候成日聽倒啲百姓話路歇斯被放逐係無辜嘅，百姓愛戴佢仲希望佢做皇帝，依家路歇斯做咗哥特人統帥，萬一兩父子裡應外合，勢必造成國家分裂，分分鐘帝位不保。(*pause*)

(6人→US)

皇后依然鎮定，佢提議派使者去搵路歇斯，叫佢返泰特斯屋企見面議和，然後由佢親自去見泰特斯，趁佢神智不清，用花言巧語迷惑呢個老將軍：即使唔能夠迫佢勸路歇斯束手就擒，至少可以利用佢嘅情面假意擺和頭酒，然後設陷阱將兩父子一網打盡。薩特尼六神無主，唯有聽從塔摩拉嘅意見，因為似乎只有咁做至有機會穩坐羅馬嘅江山。

(All Chanting, 搬椅→DS) ||: 11111 m :||

A B C B

A B

A B C B

A B C B

A B

## 第五幕

### 第一場

(康上椅，全體慢入椅底)

康： 議和嘅消息好快傳到去羅馬近郊，路歇斯嘅軍營當中。路歇斯決心要羅馬後悔，加上哥特人都想向叛國賊塔摩拉算帳，大家根本冇將薩特尼嘅提議放在眼內，就喺佢哋盤算緊點直搗黃龍之際，一個哥特將領帶住手抱黑嬰嘅艾倫求見：「我喺一座荒廢嘅寺院搵到呢個黑奴，聽到佢話呢個係佢同皇后所生嘅黑嬰，於是帶嚟俾將軍發落。」路歇斯一見仇人份外眼明，立即命令士兵攞繩出嚟，要喺樹上吊死艾倫同佢個私生野種。艾倫自知劫數難逃，不過仍然想為自己留一條血脈，就答應用路歇斯未知嘅驚人內幕，去換取自己兒子嘅性命，佢仲要路歇斯向天起誓，保證會將佢個仔撫養成人。

路歇斯嘲笑艾倫，話佢唔信神，又點會相信誓言？艾倫一啲都唔覺得羞愧，仲理直氣壯咁話：「我的確唔信神，咁又點啫？我知你好虔誠，你裏頭有樣嘢叫做良心，有好多種教條同儀式。我知道你好重視呢啲嘢，所以我要你發誓，信奉邊個神就向邊個神誓願。」路歇斯冇辦法，只好照艾倫嘅意思起誓。然後艾倫就將皇后兩個仔點折磨拉維妮姬嘅過程娓娓道來，又將自己點樣陷害巴西安、喺樹下埋金寫信嫁禍俾路歇斯兩個細佬同跟住就呢泰特斯自殘去換兩個頭顱嘅惡行都和盤托出，最後佢描述自己當時點樣同皇后為呢個悲劇笑到人仰馬翻。路歇斯大怒，佢問艾倫有冇為自己做過嘅壞事後悔、羞愧，艾倫竟然大喝一聲：「黑狗唔會面紅！」。

6 人： 「黑狗唔會面紅！」

康： 艾倫好似中咗邪咁，一口氣嘔出一生罪狀：謀殺、強姦、誣告好人、作假證供、挑撥離間、設計陷害，佢甚至享受去掘墳墓裡面嘅殘骸嚟鞭屍，仲要死不悔改咁話：「我個心裏頭最悔恨嘅，就係命運冇畀機會我做多一千件咁嘅壞事！」成個軍營都迴盪住佢嘅狠毒嘅咒罵。「如果有魔鬼嘅，但願我係一隻魔鬼，喺地府永生嘅烈火之中燃燒，但願有你喺地府陪我，等我可以繼續折磨你嘅靈魂！」路歇斯面對呢個比惡魔更惡毒嘅人，反而唔想就咁殺死佢，佢要留起艾倫嘅狗命，直至諗到天下間最痛苦嘅方法將佢置諸死地。

(All Chanting II: ||||| m :||)

A B C B

第五幕  
第二場

( § 1'00"game → pause 10" → 50"game 全體搬椅及跳躍椅)

(6 人起雙子塔, ivy→USR)

( § 20" )

清: 一隻魔鬼跌入羅網，但係另一隻魔鬼依然享盡奢華。夜闌人靜，泰特斯門前企咗三個人，係塔摩拉同佢兩個仔。佢知道泰特斯連日嚟埋喺房裡面寫血書，歇斯底里咁渴求復仇女神嘅到訪，於是塔摩拉化裝成復仇女神嚟回應泰特斯嘅禱告。

Kin: 點知泰特斯唔肯開門：「我唔係癲嘅，我知你係邊個：睇吓可憐嘅斷肢，鮮紅嘅疤痕，睇吓憂慮刻成嘅皺紋，睇吓疲累嘅白晝同傷心嘅黑夜，悲哀怨恨都可以做証，你係高傲嘅皇后，強橫嘅塔摩拉。你係咪嚟要埋我另外嗰隻手呀？」

Andy: 塔摩拉並冇知難而退，佢繼續做戲，表明自己唔係敵人而係朋人，係地獄派嚟嘅復仇女神要為佢伸張正義：「冇一個山窿幽窟、廣闊荒原抑或霧鎖山谷，可以畀染血嘅兇手或者可恥嘅強姦犯帶住恐懼匿藏，我一定搵倒佢出嚟，喺佢耳邊講出我復仇女神嘅名字，令奸惡罪人心驚膽裂。」

清: 泰特斯依然唔相信，要塔摩拉殺死身邊兩個人去証明自己係復仇女神：「如果你用戰車碌死佢咗，我就出嚟做你車伕，跟住你環繞世界，幫你配兩匹黑馬，拉住你架追魂戰車飛快奔馳，喺罪惡嘅洞穴搵出兇手；到你成車載滿佢咗嘅人頭，我就會好似一個卑微腳夫，喺車輪旁邊步行，由太陽東升直至西沉入海。」

Andy: 塔摩拉為咗說服佢，就假稱旁邊嗰兩位係佢嘅助手「強姦」同「謀殺」，之所以叫呢兩個名係因為佢咗專清算呢兩種罪人。

Kin: 泰特斯聽到之後好開心，即刻開門迎接呢三個嚟幫助佢嘅使者。但係佢一開門就俾呢三個人嘅樣嚇親，因為佢咗實在太似皇后一家，泰特斯請使者殺死所有同佢咗生得相似嘅人。

清: 跟住塔摩拉藉口為泰特斯一家復仇，叫佢邀請路歇斯到大院赴宴，到時女神就會將皇后、佢兩個仔、皇上同所有仇人帶嚟，喺泰特斯面前清算

佢哋嘅罪孽。

**Andy:** 泰特斯不虞有詐，興奮咁吩咐瑪格斯，要佢去軍營叫路歇斯返嚟同皇上皇后一齊用膳，仲請復仇女神兩位使者留低幫手。塔摩拉見泰特斯一臉癡呆，就留低兩個仔監視狀況，自己入宮向皇上滙報。

**清:** 點知佢一離開大宅，泰特斯已經叫三個姪綁起狄米斯同祈倫，又要拉維妮婭用口耽住個盆，自己就單手堅穩咁擺住利刃。整個泰特斯大宅瀰漫住血腥同暴力嘅氣息，泰特斯舉起刀：「如果我俾你哋開口，你哋有乜嘢好講！」兩個王子話：「狗賊停手！我哋係皇后個仔！」

**Kin:** 泰特斯火上加油：「我要用你哋嘅血濕潤麵粉，用你哋嘅面皮琢成肉醬，將骨頭磨成粉末，整成一個餡餅招呼你哋嗰位殘酷嘅母親！你哋對我個女太殘忍嘞，我要用更加殘忍嘅方法報仇。拉維妮婭捧住呢個盆，就係用嚟接住你哋流出嘅鮮血。」

**Andy:** 泰特斯慢慢割開狄米斯同祈倫嘅喉嚨，三個姪兒一窩蜂咁上，將兩隻奄奄一息嘅畜牲抬入廚房，準備俾泰特斯炮製呢席殘忍嘅盛宴。

*(Musician 4/15")*

第五幕  
第三場

*(Ivy 1<sup>st</sup> 難動作 1'00"*

*望觀眾 20"*

*全體搬椅回 US 原位 20"*

*全體搬椅回雙子塔，人回 DSL)*

*Ivy Shoulder stand 30"*

*望觀眾 20"*

*全體搬椅回 US 原位*

谷： 終於到咗落日西沈華燈初上嘅時候，路歇斯同瑪格斯押住艾倫同個黑嬰返到泰特斯宅，佢哋叫士兵將艾倫鎖入地下室，聽候法落。冇耐薩特尼同塔摩拉亦都從容赴宴，佢哋嚟到瀟灑住美食香氣嘅泰特斯大廳，同路歇斯等人對席而坐，大家各懷鬼胎，等泰特斯出嚟主持議和。

號聲響起，泰特斯以廚師打扮、捧住食盆嚟到客人當中，拉維妮婭面披黑紗跟喺後面，佢聽到父親必恭必敬咁呈上食物：「我親自打點，做咗啲啲皇上皇后口味嘅菜色。」

Andy: 薩特尼同塔摩拉細意品嚐，新鮮出爐嘅餡餅肉汁飽滿，齒甲留香，兩夫婦對泰特斯嘅廚藝讚不絕口。泰特斯趁機向薩特尼詢問：「皇上，如果有個人知道女兒被姦而親手將佢殺死，咁做係咪正常呢？」薩特尼對呢個突如其來嘅提問感到奇怪，但佢仍然講出自己嘅睇法：「正常。唔使個女忍辱偷生又唔使勾起父親嘅傷心事。」泰特斯覺得有道理，就慢慢行埋拉維妮婭身邊，兩父女交換一個眼神，泰特斯就喺眾目睽睽之下將佢刺死。

清： 薩特尼大嚇一驚，開口斥責泰特斯係個喪心病狂嘅父親。但係泰特斯就細細聲同個女講：「你嘅恥辱跟埋你走，我嘅哀痛亦都跟埋你嘅恥辱同歸於盡！」然後泰特斯神情平和，向薩特尼講出愛女被姦被殘，身為父親嘅佢喊到雙眼幾乎失明，依家只有死亡先可以結束大家嘅悲傷。薩特尼追問：「係邊個做嘅？」泰特斯答：「係祈倫同狄米斯，佢哋強姦咗佢，斫咗佢對手，仲割咗佢條脷，係佢哋害到佢咁樣收場。」薩特尼非常憤怒，傳令捉拿塔摩拉嗰兩個仔返嚟。泰特斯平靜咁對皇上講：「兩位王子近在眼前，喺餡餅裏面一齊焗熟，依家俾佢哋親生阿媽食返落肚。」

Masu: 塔摩拉胃裡面一陣翻騰，都嚟唔切將食物吐出，泰特斯已經揮劍令佢身

首異處。混亂中撕殺聲四起，泰特斯完成復仇使命，對反覆無常嘅羅馬同人生再無眷戀之意，由得薩特尼嘅利劍插入胸膛。至於眼白白睇住父親喪命嘅路歇斯再有辦法抑制怒火，舉手就將呢個昏庸無能嘅皇帝擊斃。一時間殺戮嘅聲音自泰特斯大宅蔓延，羅馬似乎又要陷入一片紛亂，瑪格斯同路歇斯危立樓城，大聲咁向羅馬人民講話：「可敬嘅人民，大家已經知道事實嘅真相，我哋要將零碎殘肢再組合成一個完整嘅身體。...」

**Kin:** 「...如果唔係羅馬將會自取滅亡，由一個強國變成一個窮途末路嘅孤兒，帶住恥辱咁自行了斷……泰特斯家族剩返我哋幾個，假使大家認為我哋有做錯嘅地方，請結束我哋一家嘅命運！」一直以嚟巨大嘅變亂令羅馬子孫分裂離散，佢哋感激泰特斯用熱血保衛自己嘅家園，又用性命鏟除皇室奸邪，人民都大叫「路歇斯萬歲！佢係羅馬尊貴嘅皇帝！」路歇斯回應群眾嘅歡呼：「我多謝你哋嘅擁戴，我希望能夠治癒羅馬嘅創傷，擦去佢痛苦嘅回憶！」然後佢叫人押艾倫上嚟，艾倫喺呢位新皇帝面前依然囂張。

**Ivy:** 「我唔係蘇蝦仔，我會用無膽嘅禱告懺悔我所做嘅壞事嘅咩？呸！如果我以為所欲為，我要做一萬件比我做過嘅仲要惡毒嘅衰嘢！」路歇斯怒氣衝天，傳令落去：「將佢埋喺泥土之中餓死佢；由得佢企直嚟度咒罵狂叫乞求食物。任何人救濟或者可憐佢嘅，就馬上判死罪。」當艾倫被押走嘅時候，佢大叫大跳：「如果我一生之中有做過一件好事，我就衷心後悔！」路歇斯望住呢個罪人消失喺眼前，用咗好耐嘅時間先可以平靜落嚟，佢話：「先皇屍體會葬入佢祖先嘅陵墓；我父親同拉維妮婭，就要葬入我家族嘅墳場；至於嗰個殘忍嗜殺嘅塔摩拉，將佢拋去曝屍荒野，任由飛禽走獸啄食。」

**康:** 安頓一切之後路歇斯凝望父親吻別屍體：「希望我哋嘅悲哀留喺你冰冷嘅咀唇上面，作為你個仔對你嘅最後敬禮。」瑪格斯亦都親吻泰特斯同佢講：「大哥，如果我要為你流晒我所有嘅眼淚，我一定會咁做。」然後吻別拉維妮婭：「如果你能夠復活，我願意即刻死。」最後到路歇斯吻別妹妹：「父親最疼錫嘅係你，你細個嗰陣，佢成日抱起你，你會喺佢膝頭哥上面跳嚟跳去，佢唱歌陪你瞓，你將佢嘅心口當枕頭，佢講咗好多好多故事你聽……依家我哋永別喇。」路歇斯跟住叫人擺艾倫嘅仔出嚟，佢望實個小生命，心諗：「養大佢真係可以警惕世人？」

( § 25 ” )

(蘇菲旋轉 Ivy → Masu+康 → 谷 + Kin+清+Andy)